



Toni, che ducj a Muçane a clamavin Tinòs, al faseve Del Frate, di cognom, ma ancje se in chel moment al jere denant de piçule glesie dediade a Sant Antoni, su la rive dal Turgnan, no si sintive ne un sant ne un frari. Anzit... ce che al steve par fâ al jere une vore pôc religjôs, parcè che insomp insomp, si tratave simpri di cjoli cence domandâ, ma ce che al veve parsore de sô barcjute in chel moment i pareve che pardabon al justificàs che at.

Al jentrà planc a planc, cuntun segno di crôs e un preiere. Nol jere nissun. I lumins a trimavin tal scûr de piçule navade e lui al le subit a contâju. Undis biei lumins che a ardevin sflandorôs.

Toni al tirà fûr la bocetute de sachete e al vierzè il prin lumin. *Mieç par me e mieç par te*, al barbotâ jenfri i dincj, immaginant di fevelâ cul sant.

Tant 'nd è par ducj i doi.

Cemût?! cui vevial fevelât? Toni si cjalà ator, ma nol jere nissun. Nuie, al pensà, al è miôr

che finissi il lavôr e o cori a cjase prin di scûr, ma prin, al pensà di imprometi alc al sant che lu cjalave di adalt.

Cuant che al finì di passâ ducj i lumins al tornà a meti in sachete la bocetute e si netà lis mans ontis te gjachete. Al jessè fûr e al tornâ di buride su la barcje, che al veve peade juste di front. Al veve voie di rivâ in paîs prin di scûr.

Al tornà a remâ par vignî in sù par il Turgnan, al voltà li dal puint di Modon par cjapà il Roiuz e al rivà svelt sot il puint di Polac, inte place di Muzane.

La Grande Vuere e jere finide di pôc, e Toni, che pûr al veve i siei agns, la veve une vore dure a dâi di mangjâ a dute la sô famee. Par chel al leve ancjemò a pes cul fossignin ator pes rivis plenis di canelis dal Turgnan. E al jere restât di clap cuant che al veve viodude chê code bocognone che e smaltave te curint. Un code grande come une pale di stic!

E secont lui, forsit propit Sant Antoni, chel de glesiate, lu veve judât a ispirâ chel luç, cussì grant che al veve tirât jù te aghe dut il mani de fossigne e par un pêl ancje lui, prime di rindisi. Plui lu cjalave e plui Toni al capive che nissun, a memorie di om, al veve mai cjapât un pes cussì bocon.

La femine e i fruts a jerin restâts di instupidîts a viodi chê cature, e in dut il paîs no si faseve che cjararâ dal Luç di Toni Tinòs. Al pesave, cence contâ balis, 11 kilos, come i lumins de glesie!

Toni lu tirà sù de barcje a fature, lu poià parsore di un sac su la puarte di cjase e al tirà fûr la bocete de sachete. «E a chi al è il vueli par frizilu!» al disè a la sô femine.

Il cjâf di chel luç grandonon, imbalsamât, al è restât picjât su la trâf parsore dal spolêrt fintremai che une altre grande vuere e je rivade. Toni al contave simpri cun plasê di chê cature. Ce che al contave un pôc di mancul, al jere dal vueli che al veve robât ai lumins di Sant Antoni, e chê cualchi timp dopo, rispientant la sô promesse, al jere lât a tornâ.

di Raffaele Serafini
Conte dal ostîr su ispirazion
dal libri di Adelmo Della Bianca,
“Scais e liscjis”

Par condividi:

Facebook

[WhatsApp](#)

[Telegram](#)

[Print](#)

[Email](#)